



Broj: 03/1-50-14-7-39-6/17

Sarajevo, 13.9. 2017.

**PREDMET:** Informacija o Godišnjem sastanku predstavnika komisija za odbranu i sigurnost parlamenata zemalja Jugoistočne Evrope, Sarajevo, 5.-7.juni 2017.

U organizaciji Zajedničke komisije za odbranu i sigurnost BiH, Centra za sigurnosnu saradnju u Jugoistočnoj Evropi (RACVIAC), Misije OSCE-a u Bosni i Hercegovini, te Centra za civilnu kontrolu oružanih snaga (DCAF) iz Ženeve, u Sarajevu je od 5. do 7.juna 2017. održan Godišnji sastanak predstavnika komisija za odbranu i sigurnost parlamenata zemalja Jugoistočne Evrope.

U pozdravnom obraćanju učesnicima dvodnevnog sastanka zamjenica predsjedavajućeg Predstavničkog doma PSBiH Borjana Krišto navela je da ovakve regionalne konferencije predstavljaju dobru priliku za razmjenu pozitivnih iskustava i dobrih praksi u parlamentarnom nadzoru sektora odbrane i sigurnosti. Istaknula je da će učesnici ovog skupa biti u prilici da razmijene mišljenja o brojnim pitanjima, prije svega o načinu na koji parlamentarni odbori i zakonodavna vlast u cjelini mogu dati veći doprinos u suprotstavljanju aktuelnim sigurnosnim izazovima, naglašavajući pitanja kao što su borba protiv terorizma, radikalizma i ekstremizma, borba protiv korupcije, te poštivanje važećih zakona koji tretiraju tu oblast. Krišto je istaknula da regija Jugoistočne Evrope nije bila izložena većim terorističkim djelovanjima što, kako je rekla, može biti pokazatelj da smo preventivno i na vrijeme djelovali. Istovremeno, Krišto je ocijenila kako to svima treba biti motiv za još bolju saradnju, međusobno informiranje i za ulaganje dodatnih napora u provođenje brojnih strategija, odluka i principa koji tretiraju načine suprotstavljanja aktuelnim i prepoznatim sigurnosnim izazovima.

Predsjedavajući Zajedničke komisije za odbranu i sigurnost BiH Sifet Podžić upoznao je u uvodnom izlaganju učesnike sastanka sa institucijama iz sektora odbrane i sigurnosti nad kojima ZK za odbranu i sigurnost PSBiH provodi parlamentarni nadzor. Izrazio je zadovoljstvo procesom demokratske kontrole koju ova komisija provodi nad radom Ministarstva odbrane i Oružanih snaga BiH (OSBiH), naročito u segmentima uništavanja municije i minsko-eksplozivnih sredstava (MiMES), stanja personala i procesa javnih nabavki u sektoru odbrane, zatim pomoći civilnom stanovništvu u vanrednim situacijama, te pitanja neprespektivne i perspektivne pokretne i nepokretne vojne imovine. Podžić je istaknuo da Zajednička komisija, putem institucije parlamentarnog vojnog povjerenika BiH, aktivno prati i stanje ljudskih prava i osnovnih sloboda vojnih lica i kadeta u OSBiH. Analizirajući stanje sigurnosnog sektora u BiH, Podžić je naglasio neophodnost snažnije koordinacije među policijskim tijelima i agencijama za provođenje zakona u BiH, te naveo potrebu dogradnje Sigurnosne politike Bosne i Hercegovine. Čestitajući predstavnicima Crne Gore prijem u punopravno članstvo u NATO-u, Podžić je izrazio uvjerenje da će ovaj sastanak rezultirati još

čvršćom saradnjom predstavnika institucija zakonodavne i izvršne vlasti zemalja Jugoistočne Evrope u sektoru odbrane i sigurnosti.

Osim zamjenice predsjedavajućeg Predstavničkog doma Borjane Krišto i predsjedavajućeg Zajedničke komisije za odbranu i sigurnost BiH Sifeta Podžića, u radu Godišnjeg sastanka učestvovali su i zamjenik predsjedavajućeg Zajedničke komisije Borislav Bojić, te njeni članovi Šemsudin Mehmedović, Mario Karamatić, Hanka Vajzović i Hazim Rančić, predsjedavajući Delegacije PSBiH u PSNATO-a Nikola Lovrinović, kao i parlamentarni vojni povjerenik BiH Boško Šiljegović.

Učesnicima sastanka obratili su se i direktor RACVIAC – a ambasador Haydar Berk i ambasador Austrije u BiH Martin Pammer.

Dnevnim redom sastanka predviđeno je da se u dva dana, u odvojenim panelima, razgovara o dobrim praksama u provođenju parlamentarnog nadzora odbrambenog i sigurnosnog sektora, te o aktuelnim sigurnosnim izazovima u regionu Jugoistočne Evrope.

Godišnje zasjedanje predstavnika komisija za odbranu i sigurnost parlamenata zemalja Jugoistočne Evrope, koji je održan u organizaciji Zajedničke komisije za odbranu i sigurnost BiH, Centra za sigurnosnu saradnju u Jugoistočnoj Evropi (RACVIAC), Misije OSCE u BiH, te Centra za civilnu kontrolu oružanih snaga (DCAF) iz Ženeve završeno je 7. juna 2017.

Tokom posljednjeg dana Godišnjeg sastanka, na kojem su, pored članova Zajedničke komisije za odbranu i sigurnost BiH i parlamentarnog vojnog povjerenika BiH, učestvovali i predstavnici institucija zakonodavne i izvršne vlasti koji se u zemljama Jugoistočne Evrope bave pitanjima demokratske kontrole sektora odbrane i sigurnosti, te predstavnici međunarodnih i nevladinih organizacija koje se u Bosni i Hercegovini bave pitanjima iz ove oblasti, učesnici su u panel-diskusiji razgovarali o sigurnosnim izazovima za zemlje Jugoistočne Evrope, naročito u domenu suprotstavljanja problemu ilegalnih migracija.

Nakon što su tokom prvog dana zasjedanja ministar sigurnosti BiH Dragan Mektić i ministar unutrašnjih poslova Crne Gore Mevludin Nuhodžić prisutnim učesnicima prezentirali aktuelne sigurnosne izazove ovih zemalja u regionu Jugoistočne Evrope, tokom drugog dana konferencije svoja iskustva o sigurnosnim izazovima o nelegalnim migracijama iznijeli su i predstavnici Granične policije BiH i Službe za poslove sa strancima BiH.

Uvodna izlaganja o ovom pitanju dali su zamjenik predsjedavajućeg Zajedničke komisije za odbranu i sigurnost BiH Borislav Bojić i regionalni koordinator Međunarodne organizacije za migracije (IOM) za zemlje Zapadnog Balkana Peter Van der Auweret. Predstavnici sigurnosnih agencija BiH u okviru svojih izlaganja prezentirali su modele prekogranične saradnje i dobrih praksi u borbi protiv ilegalnih migracija, kao i o aktuelnim problemima na granicama zemalja Jugoistočne Evrope, te načinima na koje se ove agencije suprotstavljaju ovim problemima. U okviru diskusije o problemu migracija u zemljama regiona, učesnici Godišnjeg sastanka tokom ovog panela razgovarali su i o saradnji između agencija za provođenje zakona na ovom polju u formi pripreme za blagovremene odgovore na aktuelne sigurnosne izazove.

Panel-diskusija okončana je prezentacijama predstavnika komisija za odbranu i sigurnost parlamenata zemalja Jugoistočne Evrope o suprotstavljanju aktuelnim sigurnosnim izazovima o kojima je razgovarano tokom dvodnevnog Godišnjeg sastanka.

Zaključujući rad, direktor RACVIAC-a Haydar Berk izrazio je zadovoljstvo stavovima koje su u okviru tri odvojena panela iznijeli učesnici Godišnjeg sastanka, koji se odnose na pitanja dobrih praksi parlamentarnog nadzora odbrambenog i sigurnosnog sektora, aktuelnih sigurnosnih izazova u regionu Jugoistočne Evrope, te sigurnosnih izazova u ovim zemljama koje se odnose na pitanja nelegalnih migracija.

U radu skupa sudjelovalo je 78 učesnika.

Učestvovali su predstavnici parlamentarnih komisija za odbranu i sigurnost BiH, Austrije, Slovenije, Srbije, Crne Gore, Makedonije, Albanije i Turske.

Predsjedavajući Zajedničke komisije

**Sifet Podžić**

**Dostavljeno:**

- naslovu

- a/a